

Athör cî Paulo gät kôc Epethuth

Wet nom

Wet tueŋ kam kəriëëc ëbën yen get Paulo athör kënë tənë kôc Epethuth ë wet kënë, “Kë cî Nhialic guiir, ke bî jal thöl akölden cî tak. Ee lôn bî yen kâk cî cak ëbën nhial ku piny mat yiic, ku tœu Raan cî lôc ku dôc kenhiim tueŋ.” (1:10) Kôc cî gam aya awic ke bik deet yic, ku bik ya pîr kediit cî Nhialic guiir kënë yic. Ku bî kôc aa tók ëbën kek Jethu Kritho.

Abaŋ athöör yic tueŋ, aci Paulo nyuôth tœ bî kôc keyiic mat thîn, ke lëk kôc dhël cî Nhialic kacke kuany thîn. Ku ye kädë cî ke adumuôm päl piny thîn, ku yik kôc lääu nom ë Wënde Jethu Kritho. Ku aye Wëi Nhialic nyuôth yo lôn bî athôn Nhialic yenhom tieŋ. Paulo ë kôc ba athöör kuen lek abaŋ ë rou yic, lôn nadë ke kôc bî ya tók kek Raan cî lôc ku dôc adhil ayic ë pierden yic kedhie. Aci jam ë waal juëc tœ bî kôc ë Nhialic luoi tók aa nyuôth thîn, ke cî rôt mat kek Raan cî lôc ku dôc. Akut kôc cî gam aciit guöp, ku ye Raan cî lôc ku dôc yen nom, tedë ke cit luak ku ye Raan cî lôc ku dôc mëen, tedë ke ye tik, ku ye Raan cî lôc ku dôc muonyde. Athör kënë ë jam wël thiek yiic apeï, rin raan ë gät ye aget ë guiër cî dhëeŋ Nhialic reer kek Raan cî lôc ku dôc beei yenhom ku yepuöu. Ku kuat kəriëëc ëbën aye tiŋ nhiër Raan cî lôc ku dôc yic, nääk, ku pel piny adumuôm, ku dhëeŋ la cök.

Käk tö thîn

Muôth tueŋ 1:1-2

Raan cî lôc ku dôc ku luaf ë Nhialic 1:3-3:21

Pîr ë yam reer ke Jethu 4:1-6:20

Muôth ciëen 6:21-24

1 ¹ Ee yen Paulo cî Nhialic kuany ba ya atuny Jethu Kritho. Tënë kôc Nhialic reer Epethuth, kôc cî Jethu Kritho gam pierden yic.

² Bî Nhialic Wäda kek Bänyda Jethu Kritho we gäm döör ku athieei.

Raan cî lôc ku dôc ë dôc wëi beei

³ Lecku Nhialic Wun Bänyda Jethu Kritho! Rin cî yok rôt mat kek Jethu Kritho, aci yen yo yiëk dôc wëi ë riel nhial. ⁴ Theer ke piny këc cak, Nhialic aci yo kuany bei buk aa miethke, wet cî yok mat kek Jethu, aci yo cöl aye kacke, kôc cîn gup awuöc.

⁵ Rin nhieer yen yo, aci Nhialic looi theer lôn bî Jethu Kritho yo cöl aye miethke, ku kënë yen ë miet puöu Nhialic yen wic. ⁶ Lecku Nhialic rin kăpuôth juëc apeï cî gäm yo ë path, rin cî yen Wënden nhieer juaar rienkua. ⁷ Rin thon Raan cî lôc ku dôc aci yok jäl riel jôŋrac yic, rin cî adumuômku päl piny. Ku këya, aye Nhialic nyuôth yo lôn diit dheen de apeï. ⁸ Dhëeŋ cî gäm yo ke diit apeï, rin ŋieec ku det yic kâŋ. ⁹ Aci Nhialic nyuôth yo yen këden cî guiir bî looi, ku acuk yök tənë Raan cî lôc ku dôc, cök a lôn wäär cî yen ye thiaan.

¹⁰ Kë cî Nhialic guiir ke bî jal thöl akölden cî tak, ee lôn bî yen kâk cî cak ëbën nhial ku piny mat yiic, ku tœu Raan cî lôc ku dôc kenhiim tueŋ.

¹¹ Ee rienke yen aye yo cöl aye mith Nhialic. Kəriëëc ëbën aaci Nhialic guiir këya wätheer, ku ë yen ke biöök teciit tœ wic ye. ¹² Këya lecku Nhialic yok kôc tueŋ wäär cî la ŋôth tənë Raan cî lôc ku dôc.

¹³ Ku ëmën aya, wek aaci yic piŋ, yiny yen wet puôth yam ye Nhialic we luök. Ku wäär cî wek Raan cî lôc ku dôc gam, aci yen we yiëk Wëi Nhialic wäär cî thon ka bî yiëk kacke. Wëi yen ë ye nyuôth lôn ye wek kacke. ¹⁴ Ku Wëi Nhialic yen ë ye nyuôth lôn bî yok kăwäär cî Nhialic thon ka bî yiëk yo yök. Ku aye kënë nyuôth lôn cî Nhialic yo wëer bei riel jôŋrac yic buk aa kacke. Këya, buk Nhialic aa leec akölaköl.

Röök ë Paulo

¹⁵ Ku wet kënë, tœyon piŋ yen gäm cî wek wet Beny Jethu gam, ku nhiër nhieer wek kacke, ¹⁶ yen akëc yen nom kaŋ mää ba we atak, tœ röök yen Nhialic aya leec rienkun. ¹⁷ Yen ë rëer ya thiëc Nhialic Wädan la diik, ku yen Wun Jethu Kritho, bî we gäm Weike bî we cöl aŋic kâŋ, ku nyuth we Nhialic bāk ŋic apath. ¹⁸ Yen ë röök aya bāk yic ŋic. Këya bāk ŋic lôn ë yen yic lôn bî wek kăjuëc puôth cî tœu tənë we yök, rin cî yen we cöl. Ku abāk ŋic aya lôn kăjuëc puôth cî thon bî ke gäm kacke aa thiek yiic apeï. ¹⁹ Ku këya,

abäk ñic aya lön rielde adit kân ebën. Ku yeen alui yogup rin cî yok wetde gam. Riel lui yogup kënë athön ke rieldit, ²⁰ wäär jöt yen Raan cî lóc ku dóc bei rañ yic, kam kóc cî thou ku jöt nhial, ku nyuuc kõñ cuëc Nhialic. ²¹ Raan cî lóc ku dóc amac wëi ril tō nhial ebën, cök alon le kek rieldit. Rienke aa thiek yiic tēnē rin bānydit mec. Ku aacie bāny mec emēn ē röt, aabi yiic thiek tēnē rin bāny bi mac aköldä. ²² Ku Nhialic aci kēriëc ebën tāau yecök, ku looi bi a yen wat akut kóc cî gam pinynhom. ²³ Ku akut kóc cî gam yen ē guöp Raan cî lóc ku dóc, yen thiāñ wëi Raan cî lóc ku dóc. Ku ē yen pīr gām kēriëc ebën teriëc ebën.

Thon cî ya pīr

2 ¹ Theer, Nhialic aci we tem thou rin awuöcdit reer wegup. ² Wätheer wek aa we ye jōñrac, jōñ yen mac jakrec ebën buöth cök, jōñ yen ye kóc cīi Nhialic thek wetde gam emēn. ³ Yok aa yo thōñ ke ke, ke yo pīr pīr rac. Ayeku looi kuat kāk wic guäpkua ku piäthkua. Ku pīrdan rac aye Nhialic yo tem awuöc cīmēn kóc kōk ē luui kārec.

⁴ Nhialic ayer puöu, ku nhier nhieer yen yo adit apei. ⁵ Nawēn cök atieepkua thou rin adumuööm juëc reer yogup, yok aaci Nhialic cöl aben pīr kek Raan cî lóc ku dóc. Ku ee dhēñ Nhialic yen aci yo luök. ⁶ Ku rin cî yok aa tōk kek Raan cî lóc ku dóc Jethu, Nhialic aci yo jöt ē thou yic ku buk rēer bānyde yic nhial kek Jethu Kritho. ⁷ Ee looi Nhialic këya rin bi kóc aköldä piathden cīn kē thōñ kek tīñ, rin nhieer yen yo, rin Raan cî lóc ku dóc Jethu. ⁸ Rin ē piath Nhialic yen aci we kony bāk pīr rin cī wek wet Jethu gam. Ee miöc Nhialic yen acöl we agam Jethu. ⁹ Pīr cuk yök acie rin ē luöida ē röt nadē ke yo nhiam ye. ¹⁰ Ee Nhialic guöp yen aci ye looi këya. Ku rin ye yok tōk kek Raan cî lóc ku dóc Jethu, aci yo cak buk kēpath aa looi, ku ē yen kē cī guiir buk aa looi.

Yok aa tōk kek Raan cî lóc ku dóc

¹¹ Këya, wek aa we cie kóc Itharel. Ku këya, wek aa we ye kóc Itharel cöl wätheer kóc kēc ñoot. Ku kóc Itharel aake ye röt cöl aaye kóc cī ñoot. Ku ñuötiden ye ke ñoot, ee yekē ye looi kegup ē path. ¹² Ku wäär wek aa we cie kóc Raan cî lóc ku dóc. Wek aa we ye thāi, wek aa we cie kóc Itharel, kóc cī Nhialic lóc. Wek aa we liu lōñ döör Nhialic yic, lōñ kóc ke tit ben Jethu Bānyda. Wek aa we reer we kuc Nhialic. ¹³ Emēn, rin cī wek aa tōk kek Jethu Kritho, wek wäär cök mec wek aaci beei tethiök rin thon Raan cî lóc ku dóc.

¹⁴ Rin Raan cî lóc ku dóc aci döör looi kam kóc Itharel ku kóc cie kóc Itharel rin cī yok aa kac tōk. Riemde aci kēwäär ke tek yiic, ku cöl ke aaye kóc man röt nyaai. ¹⁵ Aci lōñ kóc Itharel teem kōu ē thuonde, rin bi yen kóc Itharel ku kóc cie kóc Itharel cöl aaye kac tōk rin cī kek röt mat kek ye, ku kēlä, aci döör beei. ¹⁶ Ku thon cī Raan cî lóc ku dóc thou tim cī rīiu kōu, acä kuëth rēer kamkun nyaai. Ku thuonde aci yen ke cöl aaye kóc Nhialic kedhie. ¹⁷ Këya, Raan cî lóc ku dóc aci ben ku lēk kóc Wet Puöth Yam ē döör beei tēnē kóc ebën, wek kóc cie kóc Itharel wäär mec ke Nhialic ku kóc Itharel wäär thiök ke ye. ¹⁸ Ku ē rin Raan cî lóc ku dóc yen ē yo ebën, kóc Itharel ku kóc cie kóc Itharel cöl aala te rēer Nhialic thīn ē Wëi Nhialic tööñ.

¹⁹ Këya, wek kóc cie kóc Itharel, wek aaci ben aa lēi emēn, wek aa tōk kek kóc cī Nhialic lóc. Wek aa many tōñ ē Nhialic. ²⁰ Ku week aya, wek aaci yōn cī atuuc ku kóc kāk Nhialic tīñ jōk cök, ku Jethu Kritho yen ē mēn. ²¹ Raan cî lóc ku dóc yen ē kē cī buh cöl akāac ke ye tōk ku bi ya yōn Beny. ²² Ku rin ye wek tōk kek ye, week aya wek kóc kōk, wek aaci kē buh bi Nhialic a rēer thīn ē Weike.

Luoi Paulo rin kóc cie kóc Itharel

3 ¹ Rin cī Nhialic ye looi bi kóc Itharel ku kóc cie kóc Itharel mat bik aa tōk, rin dheñde tēnē kóc cie kóc Itharel ke yen Paulo, raan cī mac rin wet Jethu Kritho ē rienkun, yen ē rōök tēnē Nhialic.

² Acäk piñ lön cī Nhialic ya lóc ē dheñde ba luoi kēnē looi. ³ Nhialic acä nyuöth kēden cī guiir, cīn raan ñic ye theer, athör wäär ca göt ke ciek. ⁴ Ku na kuenkē kāk ca göt, ke wek aabi kāk ñiec ke rin Raan cî lóc ku dóc deet yiic. ⁵ Kāk cīn raan ñic ke theer, cīmēn cī Wëi Nhialic ye nyuöth atuuc ku kóc kāk Nhialic tīñ emēn.

⁶ Këya, kē cī moony akīn, rin wet puöth yam, kóc cie kóc Itharel aabi döc Nhialic yök kek kóc Itharel cī gam. Keek aabi ya kac tōk ku rōmkē kē cī Nhialic thōn kóc Itharel rin Raan cî lóc ku dóc.

⁷ Kēnē, yen ē Wet Puöth Yam ya lek kóc. Nhialic acä gām luoi ye yen Wet Puöth Yam luël riel ē dheñde. ⁸ Yen atō ciēn kóc ē Nhialic cök ebën, ku Nhialic añot cā yiēk ē luoi kēnē, ba kóc cie kóc Itharel lek kăpuöth juëc cīn thook akeu ye Raan cî lóc ku dóc gam. Kăpuöthkă aa dīt tēnē kāk ye deet yiic. ⁹ Acä yiēk luoi ba tet kóc ebën te bi yen kēden cī guiir cīi ñic, thāap thīn. Ku Nhialic yen cak kēriëc ebën, ecī kēnē moony tēnē kóc theer wäär.

¹⁰ Acī looi kēlä emēn dhēl akut kōc cī gam nyūōth atuuc nhial, kek bānyken la riel nhial, bīk njeec kānde cī nyūōth rin kē cī looi tēnē ke nje. ¹¹ Acī Nhialic tak ku looi kēya theer kēc yen piny ku nhial cak. Ku ē looi ē rin Jethu Krītho Bānyda. ¹² Rin cī yok ye gam ku yok aa tōk ke ye, aabī yok la tēnē Nhialic yo cī riōc.

¹³ Kēya, wek aa lek bāk puōth cī bath cōk amēn guum yen ē rienkun, guōmdie yen abī ya riēdun.

Nhier Raan cī lōc ku dōc

¹⁴ Rin ē wet kēnē, yen ē yanhīol guōt piny Nhialic Wāda nhom ku rōōk ē rienkun. ¹⁵ Kōcken tō nhial ku kōc tō piiny aa mac thok rin yen ē Wāda yōdhie. ¹⁶ Yen ala riel ku dōc juēc ye gām kacke. Kēya, aya thiēc bī we yiēc riel ē Weike bāk puōth cī kōc. ¹⁷ Ku yen ē rōōk bī Raan cī lōc ku dōc rēer wepuōth atheer rin cī wek ye gam. Yen ē rōōk aya bī te nhieer wek Nhialic thīn, ku te nhieer wek rōt thīn ē kamkun we cōl aril. Na luōikē kēlä ke wek aa cīt tim cī meike yet piny, ku yōn buth cī njeec jōok cōk. ¹⁸ Ku dhēl kēnē, week ku kōc ē Nhialic abāk jāl nje yen te nhieer Raan cī lōc ku dōc we thīn. Anhīar yo apei nhīer cīn thok akeu. ¹⁹ Na cōk cien raan nje ye ayic yen te nhieer Raan cī lōc ku dōc yo thīn, yen ē Nhialic thiēc bāk nje. Ku bī te ye wek luui thīn ciet te ye Nhialic luui thīn.

²⁰ Nhialic ala riel yen kān looi wār kāk yeku ke thiēc ku kāk yeku ke tak, ku aaye ke looi riēden lui yopuōth. ²¹ Lecku Nhialic rin kāpuōth cī looi rin akut kōc cī gam ku rin Jethu Krītho. Lecku akōlriēc ēbēn! Yenakan.

Men yic kōc cī gam tēnē guōp Jethu

4 ¹ Rin kē wīc Nhialic bī looi, yen raan cī mac rin looi yen wet Beny, wek alān bāk njeec luui dhēl path, dhēl yen cī Nhialic we cōl. ² Yakē kāk yakē ke looi ēbēn looi dhēl atheek ku lier ē puōu, ku yakē kōc njeec cīēn. Nhīarkē rōt ku yakē kārec pāl piny ē kamkun. ³ Wēi Nhialic acī we mat yiic, themkē bāk la dōōr ē kamkun bāk aa kac tōk. ⁴ Yook ēbēn, yok aa thōn kek kāk tō guōp tōk yic, ku yok aa la Wēi Nhialic thōn ciēn ke yo. Yok aa nōth dōc cī Nhialic thōn ke bī gām kacke, rin Nhialic acī yo cōl ēbēn buk aa kacke. ⁵ Yok aa la Bāny tōk ku gam tōk, ku yok aacī lōk ē wēi tōk yōk ēbēn. ⁶ Yook ēbēn yok aa Nhialic tōōn door, ku yen ē Wāda yōdhie. Yen amec yo ku ē luui yopuōth ēbēn, ku aciēn kek yo ēbēn.

⁷ Raan cī lōc ku dōc acī raan ēbēn ē kamkua yiēc riēden bī yen aluui. Njek acī yiēc riēde cīt te cī Raan cī lōc ku dōc ke tek thīn. ⁸ Acī gōt athōr theer wēl Nhialic yic ēlä,

“Acī la nhial, ku looi jakrec bīk yeen buōth cōk,
cīmēn raan cī dōm ē tōn yic,
ku tek kāpath tēnē kuat raan ēbēn.”

⁹ Te lueel ye ēlä, “Acī la nhial.” Wetde yic yenō? Wetde yic aye lueel lōn cī Raan cī lōc ku dōc kān ben pinynhom ē ten. ¹⁰ Raan cī ben pinynhom ē ten yen ee raan tōōn cī ben dhuk nhial, pan Nhialic, ku bī rēer kek kēriēc ēbēn pinynhom. ¹¹ Ee yen Raan cī lōc ku dōc yen ē gem miēc tēnē kōc. Acī kōc kōk looi bīk aa tuōōcke, ku kōc kōk aacī looi bīk aa kōc kāk Nhialic tīn, ku ye kōc kōk wēl ē Nhialic lek kōc, ku ye kōc kōk abiōk kōc cī gam ku piōōckē ke. ¹² Acī kēnē looi rin bī kōckā, kōc ē Nhialic, guir bīk luui tēnē ye ku bīk aakuut kōc cī gam, yen guōp Raan cī lōc ku dōc la tueŋ ke ril. ¹³ Ku kēlä, yok aabī mat yiic buk aa tōk ē gam bī yok Nhialic ku Wēnde nje. Ku jōlku aa kōc cī gam cī nhīim bak, ku yok aabī jāl la cōk cīmēn Raan cī lōc ku dōc. ¹⁴ Ku yok aacie kōc bī ben ciet mīth. Ku yok aacī kōc kāk lueth piōōc bī ben duōōn buk luethken gam, yok aacī bī ya wel nhīim cīmēn riāi, wēl lueth ē path. ¹⁵ Yok aa dhil yic aa lueel ke yo la nhīer. Ku kēlä yok aabī la tueŋ ke yo cīt Raan cī lōc ku dōc yen wat akut kōc cī gam nhom. ¹⁶ Raan cī lōc ku dōc, ee kacke mat yiic cīmēn ye rel yom thook guōp ē raan nuēt yic bī ya tōk. Na loi guōp abak luōide cīt te dhil yen luui thīn, ke guōp ēbēn ala tueŋ ke cil ke ril. Yen ē ten akut kōc cī gam. Na nhīar kōc akut rōt ku loikē luōiden, ka akut ala tueŋ apath ē riel Raan cī lōc ku dōc.

Yok aa dhil pierda waar yic

¹⁷ Rin ē wet kēnē, alek we rin Beny duōkkē ben aa luui cīmēn kōc kuc Nhialic. Kāk yekē ke looi aacie kāk ke kony. ¹⁸ Aacie yic ye deet. Acīn pīr yam ye Nhialic gām kōc, rin keek aa ril nhīim, ku kēya aa kuc dhēl ē Nhialic. ¹⁹ Aacie gup ē yār te cōk kek kārec looi, rin aa kepuōth yiēc kāk wīc guāpken. Kāk yekē ke looi ēbēn aa kāk ē bal ku aacie kōōc luoi ē kākā yiic.

²⁰ Yen ē te wiēc bī wek cī la thīn, rin acie yen tewāār cī we piōōc thīn rin Raan cī lōc ku dōc. ²¹ Ee yic, wek aacī wetde pīn, ku wek aa we cī piōōc rienke, te cīt tēn yiny reer kek Jethu. ²² Wek aacī piōōc bak tēdun ye wek luui thīn theer puōl. Kākun ke yakē ke looi aake cī we muōr ku reckē we. ²³ Emēn, calkē rōt aa weer

Nhialic puöth ku bāk ya tak teŋ ē yam. ²⁴ Nhialic aci we gām cieŋ ē yam cīt kēde. Kēya, yakē cieŋ ē cieŋ kēnē. Cieŋ kēnē ala cōk cīt te ye yic rin Nhialic piöc thīn.

²⁵ Kēya, duökkē lueth ben aa lueel. Ŋek adhīl yic alek mātthden cī gam, rin yok aa cīt kāk cīi thōŋ reer ē guāp tōk yic. ²⁶ Na cōk alōn cī yīn puōu riāāk, ke yī duk adumuööm loi. Duk reer kek riāāk ē puōu abā aköl lööny piny. ²⁷ Rin bī jōŋrac yī cīi thel adumuööm yic. ²⁸ Na le raan ye cuār theer kamkun ka cīi ben cuēer, adhīl luui ē kōŋde bī rot muk ku kony kōc ŋōŋ aya. ²⁹ Pälkē kuōc jam. Yakē ke lueel wēl kōc cōl aril puöth gamden yic. Yakē ke lueel wēl nhīar ke bī ke piŋ, rin bī yīn kōc la kē lek ke, kony. ³⁰ Muk yīn hom bī cien kē lueel bī Wēi Nhialic cōl arem puōu, Wēi cī Nhialic gām yī. Nhialic aci gām Wēi ye nyooth lōn ē yīn kēde, ku Wēi Nhialic abī rēer kek yī yet aköl luŋdīt bī Nhialic yī kony tēnē jōŋrac. ³¹ Duökkē kōc kōk ye maan ku duökkē puöth ye riāāk. Duökkē ye göth ku läätke kōc, tedē ke we loi kāk cīi path. ³² Reerkē apath ē kamkun. Ku yakē käreec pāl piny tēnē kōc kōk cīmēn ye Nhialic ke pāl piny tēnē we rin Raan cī lōc ku dōc.

Pir reer ruel yic

5 ¹ Kēya, wek aa dhil luui cīmēn Nhialic rin ye wek mīthken nhīer apeī. ² Nhīarkē kōc kōk cīmēn nhīer Raan cī lōc ku dōc yo. Cīmēn cī Jethu ye nyuöth lōn nhīer yen yo, rin cī yen thou bī yo luök. Kē cī looi, aci Nhialic cōl amit puōu rin cī yen rot juer Nhialic. ³ Wet ye wek kōc ē Nhialic aci path bī wīc wīc ē diäär, ku kāk kōc cōl ayār gup, ayī kook aa piēŋ wegup.

⁴ Jam la bīth ku buro rac aaci path. Aŋueen bāk Nhialic aleec rin kāk ye ke looi tēnē we.

⁵ Dhielkē ŋic lōn acīn raan wīc ē diäär ayī raan ē luui kāk kōc cōl ayār gup, ku raan det kok lēu ye bī la bāāny Raan cī lōc ku dōc kek Nhialic ē yic, ku yök kăpuöth cī Nhialic thōn kōc. Raan kok acīt raan ē jak cī kieet door. ⁶ Duökkē rōt cōl ameth ē nyīn wēl cīi path ye kōc kōk lueel. Nhialic abī kōc cīi wetde ye piŋ, kōc luui ē käreckā tem awuōc. ⁷ Kēya duk ye mat kek kōc luui ē käreckā.

⁸ Rin wek aa we reer ē muöth yic. Ku emēn wek aaci rōt mat kek Beny, wek aaci la ē ruel yic. Kēya, yekē luui cīmēn kōc tō ē ruel yic. ⁹ Yen aluel kēnē rin kōc tō ruel yic, kōc ŋic Nhialic, aaye ruel cōl alir puöth ku loikē kēn ē yic. ¹⁰ Themkē bāk kāk Beny cōl amit puōu ŋic ku luokē ke. ¹¹ Duökkē ye luui kāk ye kōc tō muöth yic looi, kōc kuc Nhialic. Nyuöthkē ke lōn kākā aaci path. ¹² Kāk ye ke looi ke cie tiŋ, aa rec apeī ka ye jamden kōc rac gup. ¹³ Te bīi kăŋ teyer, ke kōc aa tiŋ te reec kākā thīn, ¹⁴ rin ē ruel yen ē kēriēc ebēn cōl atīŋ. Yen aci ye lueel elä, “Pääckē nīn yic, jatke rōt reŋ yiic ku Raan cī lōc ku dōc abī ruel wegup.”

¹⁵ Tiēŋkē pierdun apath. Duökkē pīr ē pīr kōc kuc Nhialic, calkē rōt aaye kōc ŋic kăŋ. ¹⁶ Kuat te bī yīn ye yök ba kēpath looi thīn, ke loi, rin kōc aa loi kāk cīi path emēn. ¹⁷ Duökkē lui ē luoi kōc cīnkē ŋickē, ŋieckē kē wīc Beny ku yen luokē. ¹⁸ Duökkē ye dek ē möu, möu ē kōc rac. Calkē Wēi Nhialic pierdun yic akölaköl.

¹⁹ Ketkē waak ē Nhialic cī göt athör waak yic ē kamkun. Ketkē wak wēi bāk Beny leec ē piäthkun ebēn.

²⁰ Yeku Nhialic Wāda leec akölaköl rin Bānyda Jethu Krītho, kuat kăjuēc yeku ke looi yiic.

²¹ Yakē rōt theek ē kamkun rin riöc wek Raan cī lōc ku dōc.

Diäär ku Röör

²² Wek diäär, thekkē röörkun cīt te ye wek Beny theek thīn. ²³ Rin moc yen ē tik wat nhom, cīmēn ye Raan cī lōc ku dōc akut kōc cī gam wat nhom. Raan cī lōc ku dōc yen aluāŋ akut kōc cī gam, yen guāpde aya.

²⁴ Kēya, diäär aa dhil röörken theek cīmēn ye akut kōc cī gam Raan cī lōc ku dōc theek.

²⁵ Wek röör wek aa dhil diäärkun nhīar cīmēn nhīer Raan cī lōc ku dōc akut kōc cī gam arek abī thou rienke. ²⁶ Aci thou rin akut kōc cī gam bī rēer ke dhēēŋ Nhialic. Ku lōk kegup piū ē Nhialic piū ē lōk wēi ku wetde. ²⁷ Aci kēnē looi rin bī yen kacke kōc cī gam, wuöŋny gup wei käreec ku bīi ke yelööm. Ku akēc wīc bīk gup la adumuööm. ²⁸ Cīt ē kēnē aya, röör aa dhil diäärken nhīar cīmēn nhīer kek rōt. Na nhīar moc tiēŋde, ka thōŋ kek lōn nhīer yen rot. ²⁹ Acīn raan man guāpde, raan ē mīth ku tiit guāpde, cīmēn ye Raan cī lōc ku dōc akut kōc cī gam tiit, ³⁰ rin yok akut kōc cī gam, yok aa guāpde. ³¹ Cīmēn cī ye göt athör theer wēl Nhialic yic elä, “Moc abī wun ku man nyāāŋ piny ku met rot kek tiēŋde, ku keek karou aabī ya tōk.”

³² Wēlkā aa la yiic yinydīt apeī, ku aa jam te ye Raan cī lōc ku dōc tōk thīn kek akut kōc cī gam. ³³ Ku wēlkā aa jam rienkun aya, moc adhīl tiēŋde nhīar cīmēn nhīer yen rot, ku tik aya adhīl muōnyde theek.

Mith ku kōc ke dhiēth ke

6 ¹ Wek mīth, wek aadhīl kōc ke dhiēth we theek, rin yen ē kēpath lēu bī raan looi rin Beny. ² “Thek wuur ku moor,” Kēnē yen ē lōŋ tuēŋ cī ben kek athōn, ³ athōn akīn, “Na loi kēnē, ke yīn abī kăjuēc path ya

yök, ku thiei yi ba nïn juëc nök pinyhom.” ⁴ Koc ke dhiëth duökkë miethkun ye luöi käk bi ke rac puöth. Muökkë ke ku piöckë ke dhël cï Beny gam.

Aloony ku Bänny

⁵ Aloony, thekkë bännykun muk we pinyhom ë ten, riääckë ë ke ku thekkë ke piändun ëbën ciet we luui Raan cï lóc ku dóc. ⁶ Yakë luui ë puön yer te cök kek cï daai we. Loi luöidu puöu ëbën cït te wïc Nhialic ye thïn, rin yïn alony Raan cï lóc ku dóc. ⁷ Na cök alon ye yïn alony, lui puön yer bi ciet Nhialic yen luöi. ⁸ Jic yïnhom lön bi Nhialic raan ëbën yiëk këde, alony ku raan cie alony, rin kăpuöth ye looi pinyhom. ⁹ Wek koc mac aloony, wek aadhil luui ë dhël tööj yic, ku duökkë ke ye riäac ë nääk, muökkë wenhiim lön week ëbën, aloony ku week, benydun ë tök nhial, raan bi luk looi kamkun ëbën ke cïn raan gusen.

Töj tënë Jöhrac

¹⁰ Wet jäl lek we ciëen akin, lömkë riel tënë Beny bäk riel ë ye, rin rielde adit apei. ¹¹ Lömkë käk cï Nhialic gäm we bi wek röt kony, bäk kăjuëc ye jöhrac we ruëeny göök. ¹² Rin yok aaci thär kek koc cit yo, yok aa thär kek jakrec rëer ë muöth yic kek bännyken, ku riel ë jöhrac tö nhial. ¹³ Këya, rin ë wet kënë lömkë käk cï Nhialic gäm we bi wek töj thör. Na aköl le jöhrac ben, ke we tit röt ye akölrüëc ëbën. Ku na cök töj jöhrac göök këriëc ëbën yic, ke wek aabi döj we ril. ¹⁴ Lömkë yic bi wek röt guir ë töj. Ku luöikë kë la cök ke cit alanh dhie ye raan yeyic duut te le ye töj. ¹⁵ Reerkë ke we ye koc lek Wet Puöth Yam ë döör bëi tënë koc. Ku yen abi ciet lön cien wek war ril apei wecök. ¹⁶ Det akin, gamkë Jethu Kritho. Gamdun abi ciet kön ye wek wieth dep ye jöhrac we moc jöc yiic. ¹⁷ Jieckë alanden lön cï Nhialic we luök, acit lön dhie cien raan akuäma yenhom töj yic, bi cï yup nhom. Lömkë wet ë Nhialic ë ben tënë Wëi ke cit töj ye muk. ¹⁸ Yakë lac röök cit te ye Wëi Nhialic we cök puöth thïn. Ku thiëckë Nhialic bi we kony këriëc ëbën yiic. Yakë wepuöth cök te röök wek ku duökkë thör. Yakë röök akölaköl rin koc ë Nhialic.

¹⁹ Röökkë ë rienkie, ku lön bi Nhialic ya gäm wël la cök ba lueel te le yen wet ë Nhialic lek koc ke ya cï riöc. ²⁰ Jethu Kritho acä lóc ba ya atuönyde ba koc lek Wet Puöth ë Yam, ku ë yen wet cï ya mac. Këya, röökkë ku thiëckë Nhialic bä gäm riel ba wetde lek koc ke cit yiny dhiel looi ke cïn riöc.

Muöth ciëen

²¹ Tikuth, wämääthdan cï gam nhiarku, ku yeen alui apath rin Beny, abi we lek wël ë yam rienkie ku bäk kë luöi jic. ²² Yen atuöc we ku bi we la lek kë loi rot tënë yo, ku deet wepuöth aya.

²³ Bi Nhialic Wäda ku Bännyda Jethu Kritho we yiëk döör, wek koc cï gam. Ku bik we cöl anhiar röt ë kamkun ku muökkë gamdun. ²⁴ Bi Nhialic dheengde nyuöth koc nhia Bännyda Jethu Kritho kek nhierden cïn thok akeu.